

RIJEČ REDAKCIJE

Ovaj broj *Priloga* ima donekle drukčiju strukturu od dosadašnjih brojeva. Sadrži jedan blok naslovljen *Bilinopoljska abjuracija 1203.*, u kojem šampamo saopćenja sa međunarodnog naučnog kolokvija što su ga u povodu 800. godišnjice toga događaja zajednički organizirali Institut za istoriju u Sarajevu i Hrvatski Institut za povijest iz Zagreba. Kolokvij je održan 30. aprila u Sarajevu 2003. godine. Iako se bave jednom te istom temom, ponuđeni tekstovi različite su kvalitete, od onih koji ostaju u metodičkim okvirima zacrtanim još krajem XIX. st. ne nudeći novi uvid u problematiku, do modernih pristupa koji se uklapaju u crkveno-politički kontekst ovoga vremena, obilježenog pontifikatom pape Inocenta III. i vojno-političkim slomom Bizanta u Četvrtom križarskom ratu. Uzimajući ih, ipak, kao cjelinu nastalu u okviru naučnog kolokvija, Redakcija *Priloga* je odlučila da ih objavi i na taj način učini pristupačnim široj naučnoj javnosti. Tako će sve dobre i manje dobre strane svakog od ovih radova dobiti šansu za provjeru i naučna sučeljavanja.

Drugi dio ovoga broja čine *Naučne rasprave*, u kojem objavljujemo četiri rasprave o historiji Bosne i Hercegovine i Balkana. I ove rasprave imaju različite metodološke pristupe u obradi naslovljenih tema. Sve ih objedinjuje naučna utemeljenost, što mora biti osnovni kriterij za objavljivanje svi članaka u časopisu *Prilozi*.

Treći dio ovoga broja naslovljen je *Historijska građa*. Redakcija u ovom broju objavljuje u prijevodu sa turskog na bosanski jezik dva berata i jednu međžmuu, smatrajući da ta građa pruža određene nove poglede i informacije zanimljive za istraživače koji se ne koriste turskim jezikom. I u narednim brojevima objavljivat će se arhivska građa, uz kritičku naučnu obradu.

Četvrti dio *Priloga* su *Izlaganja sa naučnih skupova*. U ovoj rubrici ćemo ubuduće objavljivati one priloge koji su podneseni na naučnim skupovima i predavanjima, a koji neće biti štampani u zasebnim publikacijama sa tih skupova. U ovom broju objavljujemo dva priloga koja su bliska po tematici koju tretiraju, ali su različitoga metodološkoga pristupa. Redakcija ih objavljuje u želji da potakne širu raspravu o pitanjima koja se tretiraju. Naravno, iza tvrdnji u svim priložima uvijek stoje samo autori.